

Na osnovu člana 29.stav 1 tačka 1 i stav 2. Zakona o izvršenju Budžeta Tuzlanskog kantona za 2008. godinu («Službene novine Tuzlanskog kantona», broj: 14/07, Ministarstvo industrije, energetike i rudarstva d o n o s i:

ODLUKU
o utvrđivanju kriterija za korištenje sredstava sa budžetske pozicije
13010002

I

Ovom Odlukom utvrđuju se kriteriji za korištenje budžetskih sredstava sa budžetske pozicije 13010002 «Intervencije javnim preduzećima, i privrednim društvima» koja se sastoji od transfera (grantova): «Subvencije javnim preduzećima», «Grantovi drugim nivoima vlade», i «Subvencije privatnim preduzećima».

II

Sredstva sa transfera «Subvencije javnim preduzećima», ekonomski kod 614400, dodjeljivat će se privrednim subjektima kao:

a) Pomoć javnim preduzećima iz resorne nadležnosti koji u održavanju tekuće likvidnosti nisu u mogućnosti da plaćaju zdravstveno osiguranje uz uslov:

- da nemaju proizvodnih aktivnosti ili je korištenje kapaciteta ispod nivoa koji ne omogućava postizanje tekuće likvidnosti, plaćanje zdravstvenog osiguranja zaposlenika i drugih obaveza.

b) Učešće u sufinansiranju »Programa mjera za socijalno zbrinjavanje zaposlenika koji su u procesu stečaja, likvidacije, restrukturiranja i privatizacije preduzeća ostali ili ostaju bez posla» i materijalno zbrinjavanje zaposlenika koji ostaju u društvima a ista su u procesu restrukturiranja uz uslov da je:

- urađen Program mjera sa strukturom i izvorima sredstava za realizaciju u skladu sa «Programom mjera za socijalno zbrinjavanje zaposlenika koji su u procesu stečaja, likvidacije, restrukturiranja i privatizacije preduzeća ostali ili ostaju bez posla» («Službene novine Federacije BiH» broj: 5/07).

c) Intervencije javnim preduzećima iz resorne oblasti, kao pomoć u postizanju ekonomske samoodrživosti (podsticaj izvoza, novo zapošljavanje, povećanje ukupnog prihoda, priprema za restrukturiranje i privatizaciju) uz uslov:

- da je urađen Plan poslovanja za 2008. godinu koji obavezno sadrži elemente iz prethodnog stava sa strukturom potrebnih sredstava,
- da je podnešen zahtjev za dodjelu sa preciziranim programom i namjenom utroška sredstava,

d) *Sufinansiranje troškova predstečajnog postupka u javnim preduzećima uz uslov:*

- *sufinansiranje predstečajnog postupka može se vršiti za društva gdje nema proizvodnih niti uslužnih aktivnosti.*

e) *Poticaj novih investicija i razvoja u javnim preduzećima uz uslov:*

- *da imaju urađen Program investiranja sa naznačenim izvorima sredstava,*
- *da se radi o privrednim društvima koja kroz program investiranja značajno podstiču i osiguravaju održavanje i proširenje kapaciteta, koji omogućava povećanje kapaciteta drugih privrednih društava sa kojima čine tehničko-tehnološku cjelinu, te predstavljaju uslov za razvoj sistema koji čine,*
- *da značajno rješavaju ekološke probleme.*

f) *Sredstva namijenjena za hitne intervencije dodjeljivat će se u slijedećim slučajevima:*

- *havarije industrijskog postrojenja,*
- *elementarnih nepogoda koje su prouzrokovale veliku materijalnu štetu,*
- *kao i u drugim situacijama za koje Ministarstvo procijeni da treba hitno djelovati uz saglasnost vlade TK.*

III

Sredstva sa transfera «Grantovi drugim nivoima vlade», ekonomski kod 614100, koristit će se kao:

a) *Pomoć u izgradnji industrijskih i poslovnih zona u Općinama koje imaju:*

- *Odluku o izgradnji industrijskih ili poslovnih zona od strane Općinskog vijeća,*
- *prostor namjenjen za industrijske i poslovne zone usklađen sa Regulacionim planom Općine,*
- *predviđena sredstva u Općinskom budžetu za izgradnju infrastrukture industrijske i poslovne zone ili da postoji Općinska odluka o smanjenju cijene zemljišta, rente, taksu i drugo.*
- *ako je bilo ulaganja u predhodnoj godini od strane ovog Ministarstva, tada treba dostaviti izvještaj o utrošku sredstava, te ukoliko je isti pozitivan odlučivat o novim sredstvima.*
- *Nadzor nad utroškom sredstava vršit će Ministarstvo industrije, energetike i rudarstva.*

b) *Pomoć u izgradnji industrijskih objekata u industrijski nerazvijenim općinama uz uslov:*

- *da podnesu zahtjev i investicioni Program sa svim potrebnim elementima i fazama realizacije,*
- *da imaju Odluku Općinskog vijeća o pokretanju proizvodne djelatnosti.*

IV

Sredstva sa transfera «Subvencije privatnim preduzećima», dodjeljivat će se privrednim društvima iz oblasti rudarstva, hemijske, metaloprerađivačke i elektroindustrije, industrije gume i plastike, obuće i tekstila, građevinarstva i grafičke industrije, sa sjedištem na području Tuzlanskog kantona kao pomoć u realizaciji investicionih aktivnosti uz ispunjenje slijedećih uslova:

- da posjeduju investicioni program sa svim potrebnim elementima i fazama realizacije programa,
- da su po strukturi kapitala sa najmanje 51% privatnog kapitala,
- da je društvo izmirilo ili ugovorom reprogramiralo obaveze prema poreznoj upravi i fondovima (PIO/MIO, zdravstvenog osiguranja) (Datum sa kojim su ove obaveze regulisane biće određen u Javnom pozivu),
- da će za realizaciju programa privredna društva obezbijediti minimalno sredstva u visini sredstava na koje apliciraju,
- da će program za koji se traže sredstva realizovati u roku objavljenom u Javnom pozivu,
- ako su u ranijem periodu koristili pozajmice od Vlade TK ili imali dugovanja po drugom osnovu, da su iste vratili ili na drugi način regulisali,
- da nisu bili korisnici ovih sredstava po Javnom pozivu iz predhodne godine.
- da privredna društva imaju zaposlenih pet ili više radnika na neodređeno vrijeme.
- da će po apliciranom investicionom programu zaposliti novih pet ili više zaposlenika na neodređeno vrijeme.

Visina sredstava po grantovima:

- a) 3 granta po 200.000,00 KM za privredna društva koja već zapošljavaju 100 i više radnika na neodređeno vrijeme;
- b) 10 grantova po 100.000,00 KM za privredna društva koja već zapošljavaju 30 i više radnika na neodređeno vrijeme;
- c) 12 grantova po 50.000,00 KM za privredna društva koja već zapošljavaju 5 i više radnika na neodređeno vrijeme.

Raspodjela sredstava vršit će se na osnovu slijedećih kriterija:

- a) broj zaposlenih radnika na neodređeno vrijeme u privrednom društvu (na dan koji će biti određen u Javnom pozivu) 200 bodova,
- b) broj novouposlenih radnika na neodređeno vrijeme po Programu za koji se traže sredstva 1000 bodova,
- c) visina investicionog ulaganja po programu,
- d) neto izvojni rezultati (izvoz-uvoz) u 2007. godini.

Vrednovanje kriterija iz člana IV vršit će se na slijedeći način:

- a) broj predviđenih bodova po ovom kriteriju (200) dijeliti sa ukupnim brojem radnika svih privrednih društava koja su ispunila uslove. Na ovaj način dobit će se broj bodova po jednom zaposlenom radniku. Dobiveni broj bodova po jednom zaposlenom radniku, množit će se sa brojem radnika koje već ima navedeno društvo što će predstavljati osvojeni broj bodova po ovom kriteriju;*
- b) broj bodova predviđenih za ovaj kriterij (1000) dijeliti sa ukupnim brojem budućih novouposlenih radnika svih privrednih društava koja su ispunila uslove. Na ovaj način dobit će se broj bodova po radniku koji će se uposliti. Dobiveni broj bodova po radniku množit će se sa brojem radnika koji će se uposliti po svakom programu što će predstavljati osvojeni broj bodova po ovom kriteriju;*
- c) visina investicionog ulaganja vrednovat će se na način da se na svakih 100.000,00 KM investicija dobija (jedan) 1 bod pri čemu će se za svakih 10.000,00 KM dodjeljivati 0,1 bod;*
- d) neto izvozni rezultat vrednovat će se tako što će za svaku vrijednost neto izvoza (izvoz-uvoz) od 1.000.000,00 KM dodjeljivati (jedan) 1 bod, pri čemu će se za svakih 100.000,00 KM dodjeljivati 0,1 bod.*

Sva društva koja ispunjavaju uslove i kriterije vrednovat će se tako što će se grantovi dodjeljivati prema ukupno osvojenom broju bodova na slijedeći način:

- prva tri društva koja su ispunila kriterije sa najvećim ukupnim brojem osvojenih bodova dobivat će grant od 200.000,00 KM,*
- društva sa ukupno osvojenim bodovima od rednog broja 4 do 14 dobit će grant od 100.000,00 KM,*
- društva sa ukupno osvojenim bodovima od rednog broja 14 do 25 dobit će grant od 50.000,00 KM.*

Broj bodova za svaki od navedeni kriterija kao i način vrednovanja bit će objavljen u Javnom pozivu.

U slučaju da ne bude dovoljno aplikacija za grantove od 200.000,00 i 100.000,00 KM, (zaposlenih preko 100 odnosno 30 zaposlenika) Ministarstvo zadržava pravo da privrednim društvima koja ispunjavaju uslove ponudi neraspoređene grantove, tako što će se sredstva iz neraspoređenog granta raspoređiti u grantove predviđene tačkama b) i c) stava IV odnosno sve u c) stava IV.

Primalac sredstava obavezan je deset dana nakon potpisivanja ugovora o korištenju sredstava, dostaviti bankovnu garanciju na iznos dobijenih sredstava.

Ministarstvo industrije, energetike i rudarstva će na osnovu utvrđenih kriterija raspisati Javni poziv za dodjelu sredstava za korištenje sredstava za subvenciju privatnim preduzećima, isti objaviti u jednom od dnevnih listova i imenovati stručnu komisiju koja će izvršiti vrednovanje dostavljenih programa u skladu sa utvrđenim kriterijima, imenovati lice za kontakt i pomoć privrednim subjektima oko apliciranja.

V

Sredstva iz granta «Subvencije privatnim preduzećima» mogu se dodjeljivati privrednim društvima na osnovu Zaključka o usvajanju prijedloga mjera za poboljšanje uslova poslovanja privrednih društava u industriji tekstila kože i obuće usvojene na redovnoj sjednici Skupštine TK održanoj 27.02.2008.god.

Resorno ministarstvo će pratiti stanje u privrednim društvima i interventno pomagati dodjeljivanjem sredstava sa budžetske pozicije «Intervencije javnim preduzećima i privrednim društvima» (tačka 7 Programa mjera).

Na osnovu tačke 8. Programa mjera, Ministarstvo može obezbjediti materijalnu pomoć zaposlenicima privrednih društava iz resorne oblasti, koji nisu stekli uslove za ostvarivanje prava na materijalno zbrinjavanje kod Zavoda za zapošljavanje.

VI

Ova Odluka stupa na snagu danom davanja saglasnosti od strane Vlade Tuzlanskog kantona i bit će objavljena u «Službenim novinama Tuzlanskog kantona».

BOSNA I HERCEGOVINA
Federacija Bosne i Hercegovine
TUZLANSKI KANTON
Ministarstvo industrije,
energetike i rudarstva

MINISTAR
Sehudin Ograšević, dipl.ing.maš

Broj: 03/1-
Tuzla, _____ 2008. godine